

Sistema Atensaun no Responde Sedu (AtReS) iha periodu Abril-Maiu 2022 kontinua implementa servisu monitorizasaun ba insidente violénsia ne'ebé akontese, iha Munisipiu Baukau, Bobonaro, Covalima, Dili no Manufahi. Sistema AtReS ne'e implementa, tanba hetan parseria ho rede monitorizadór sira iha baze atu halibur informasaun kona-ba insidente violénsia sira. Insidente ne'ebé rekolla, regulármente haruka ba koordenadór Munisipiu sira hodi elabora hamutuk iha sistema baze de dadus nasional liu husi sistema online. Ekipa Jestór baze de dadus iha nasional kontinua halo verifikasaun ikus ba dadus refere no haruka ba Jestór programa hodi Analiza ba kauza sira ne'ebé hamosu insidente ho violénsia ne'ebé akontese. Ba maluk sira ne'ebé interese atu hatene kle'an kona-ba dadus insidente no atividade prevensaun konfliktu no harii dame iha comunidade ne'ebé akontese iha Timor-Leste, bele asesu iha [www.atres.belun.tl](http://www.atres.belun.tl)

Dadus husi Sistema AtReS iha Revista situasaun periodu Abril-Maiu 2022 ne'e, Munisipiu 5 no kobre Postu Administrativu hamutuk 15, mak hanesan Munisipiu Baukau kobre Postu Administrativu 3 mak Baukau Vila, Laga no Vemasse, Munisipiu Dili kobre Postu Administrativu 5 mak hanesan Dom Aleixo, Cristo Rei, Na'in Feto, Metinaro no Vera Cruz. Munisipiu Bobonaro kobre postu 3 mak Atabae, Balibo no Maliana Vila, Munisipiu Covalima kobre Tilomar, Suai Vila no Zumalai, no Munisipiu Manufahi kobre Alas, Fatuberliu no Same Vila, Parseiru monitorizador ne'ebé ativu hamutuk na'in 17, neen (mane 10 no feto 7) mak halo monitorizasaun direita ba insidente iha terenu. NGO Belun hasoru difikuldade kestaun rekursu, karik ba futuro hetan apoiu rekursu ruma sei kabe mós tan sistema AtReS ba Munisipiu sira seluk.

Dadus insidente iha Munisipiu lima iha periodu ne'e ho deskreve hanesan tuir mai:

**ASUNTU NE'EBÉ PRESIZA TAU ATENSAUN**

- ▶ **Insidente 29 Violensia Bazeia ba Jéneru (VBJ)**
  - **Violensia Domestika 18**
  - **Violasaun Asédiu seksuál, oho no Soe Bebe**
- ▶ **Insidente Violensia tanba Disputa Rai 6**
- ▶ **Insidente 6 liga Krime Eleitoral iha Eleisaun Prezidensiál**

Total Insidente	
Baukau	42
Bobonaro	2
Covalima	7
Dili	61
Manufahi	12
<b>Grand Total</b>	<b>124</b>

**INSIDENTE VIOLÉNSIA IHA MUNISIPIU 5  
PERIODU ABRIL-MAIU 2022**

Belun ho nia Sistema AtReS iha periodu Abril-Maiu 2022 hetan apoiu ho orsamentu husi USAID (Povu Amerikanu) liu husi programa USAID/Timor-Leste NGO Advocacy for Good Governance Activity ne'ebé implementa husi Counterpart International ho naran Atividade USAID no Centro Nasional Chega! (CNC) I.P. Hodi kontinua rekolla dadus insidente iha Munisipiu Baukau, Bobonaro, Covalima, Dili no Manufahi. Insidente ho violénsia ne'ebé akontese iha periodu ne'e hamutuk 124, Husi total numeru insidente ne'ebé rekolla, kontinua hatudu porsentajen insidente ne'ebé boot liu iha Munisipiu Dili ho 49%, enkuantu, Baukau 34%. Manufahi 10%, Covalima 6% no Bobonaro 1%.

Haree husi jéneru perpetrador, iha insidente 102 envolve perpetrador ho jéneru mane, insidente 12 mak envolve perpetrador ho jéneru feto, insidente 6 mak envolve perpetrador ho jéneru feto no mane, enkuantu insidente 4 mak la hatene perpetrador sira nia jéneru ka deskoñesidu. Enkuantu vitima husi insidente ne'e, mane 71, feto 41, no vitima feto no mane hamutuk 10, enkuantu insidente 2 la hatene nia vitima (estrage sasan no propriedade). Perpetrador ne'ebé involve iha insidente ne'e tuir kategoria idade Joven, maka hanesan 45% husi idade tinan 25-34, 33% husi idade tinan 18-24, 10% husi idade tinan 35-44 no 8% ho idade husi tinan 45 ba leten no 4% idade labarik husi tinan 12-17. Enkuantu vítima sira tuir kategoria idade joven tinan 18-24 iha 33%, idade tinan 25-24 iha 41%, 35-44 iha 8%, idade tinan 45 ba leten iha 10% no idade labarik 11 ba kraik iha 3% no idade tinan 12-17 iha 5%. Ita haree jerálmente husi insidente iha periodu ne'e 75% idade juventude mak involve iha insidente sira ne'ebé akontese.

Insidente tuir Perpetrador sira nia pozisaun ka status sosiál mak hanesan maioria perpetrador husi to'os no natar na'in hamutuk 41, perpetrador nudar viziñu iha bairo hamutuk 30, perpetrador husi membru familia hela hamutuk iha insidente 26, perpetrador nudar familia hela iha uma keta-ketak hamutuk insidente 18, enkuantu perpetrador Militante partidu iha insidente 1, prepatrador nudar estudante iha insidente 22, perpetrador mai husi ema dezempregu iha comunidade hamutuk insidente 20, perpetrador husi Grupu Arte Marsiais (GAM) hamutuk insidente 10, enkuantu iha insidente 5 perpetrador nudar ema deskoñesidu, iha mos insidente 5 involve perpetrador husi ofisiál Governu, insidente 1 perpetrador involve husi mestre sira, perpetrador husi membru PNTL involve iha insidente 2, enkuantu insidente involve perpetrador husi membru Seguransa privadu iha insidente 1, veteranus iha insidente 1.

Vitima sira nia knaar iha sosiedade, Vitima husi to'os no natar na'in hamutuk 38, viziñu 27, nudar membru familia hela iha uma hanesan iha 27, membru familia hela iha uma keta-ketak hamutuk 17 membru arte marsiais hamutuk 8, ema ho dezempregu hamutuk 17, estudante iha 26 ema dezkoñesidu iha 1, la-hatene vitima nia knaar tanba estrage propriedade hamutuk 1, vitima husi militante partidu Politik iha 1, ofisiál governu iha 3, vitima veteranu iha 1, vítima membru PNTL iha insidente 1, vítima ofisiál Governu iha insidente 3, no membru seguransa privadu iha 1.

Sasan no materiál ne'ebé uza bainhira halo insidente sira maka hanesan, iha insidente 81 uza isin lolon ezemplu. Hanesan liman, ain, nehan hodi tata, sst. Insidente 71 uza ibun hodi istori malu, haksasuk malu no diskute malu. Insidente 29 uza fatuk hodi tuda malu. Iha insidente 20 uza liafuan hodi ameara malu, nomos iha insidente 5 uza Ai dona, besi kanu, Insidente 1 ema ne'ebe uza rama Ambon 1 no iha insidente 34 ita labele identifika sasán no material ne'ebé sira uza bainhira halo violénsia.

Fator sira ne'ebé kontribui ba hamosu insidente, maka hanesan maioria Insidente akontese tanba liga ba Odiu vingansa no laran moras liga ba problema pasadu hamutuk insidente 72, iha insidente ne'ebé akontese maibé ita la-hatene nia kauza hamutuk insidente 31, akontese tanba autor no vitima hemu tua lanu iha insidente 12, kauza husi insidente Problema kona-ba polítika governu ka programa seluk iha insidente 4, la kontente ho rezultadu eleisaun Prezidensiál iha insidente 1, problema Asuntu adultériu (selingkuh) insidente 6, Problema kona-ba deve osan ba

malu iha insidente 8, Disputa kona-ba rai ba to'os, natar no rai ba uma fatin iha insidente 7, Asidente ne'ebé provoka insidente iha insidente 3, Problema entre Grupu Arte Marsial (GAM) iha insidente 9, Problema liga ba adat ka barlakeadu iha insidente 2, nomos deskonfia ka na'ok sasán iha insidente 3, Aleinde ne'e iha mos iha insidente violensia bazeia ba Jéneru hamutuk 26, maka hanesan, asediu seksuál iha insidente 2, tráfik uumanu iha insidente 1, abandona família iha insidente 3, violensia domestika iha insidente 18, kazu inan hakotu bebé nia vida no soe bebé nia isin mate iha lixu insidente 1, dun malu buan iha insidente 1.

Insidente hirak ne'ebé akontese no hetan intervensaun husi membru familia, viziñu, kolega sira, hetan intervensaun mós husi parte seguransa hanesan parte seguransa PNTL no autoridade lokal sira. Maioria insidente keixa iha PNTL no kontinua halo investigasaun ho prosesu ba Tribunal, iha insidente balun rezolve liuhusi prosesu mediasaun.

Konsekuensia husi insidente sira ne'e, resulta mate mane na'in 2, kanek todan iha mane na'in 2, kanek todan iha fetu na'in 1, kanek kmaan mane na'in 23, kanek kmaan fetu iha ema na'in 1, ema halai husik hela sira nia uma iha fatin insidente hamutuk insidente 8, uma konstrusaun a'at iha insidente 4 no mós estraga transporte (karreta no Motor) hamutuk insidente 6.

#### **VIOLENSIA BAZEIA BA JÉNERU (VBJ) AKONTESE INSIDENTE 29 IHA MUNISIPIU 4**

Periodu fulan Abril-Maiu 2022, Insidente Violensia Bazeia ba Jéneru (VBG) hamutuk 29, akontese iha Munisipiu Baukau iha insidente 16, Covalima iha insidente 1, Dili iha Insidente 8 no Manufahi iha insidente 4, Insidente hirak ne'e ho nia karakteristiku maka hanesan:

- **Insidente Violensia Doméstika**

Bazeia ba Lei Kontra Violénsia Doméstika (LKVD) objetivu kona ba estabese rejime juridiku maka bele aplika ba prevensaun violénsia doméstika no mós ba protesaun no asisténsia ba vítima sira husi violénsia ida ne'e. artigu 2 no 3 violénsia doméstika sai hanesan problemátika ida ne'ebé tinan ba tinan sempre mosu, no mós sai hanesan problema sosiál ida difisil liu iha tempu ida agora daudaun. Tuir dadus monitozasaun sistema AtReS periodu fulan Abril- Maiu 2022 insidente Violénsia doméstika ho total insidente 18, Insidente 12 akontese iha Munisipiu Baukau, insidente 5 akontese iha Munisipiu Dili no insidente 1 akontese iha Munisipiu Manufahi. Kazu violénsia doméstika hirak ne'e akontese tanba la satisfás ba hahalok entre família sira iha uma laran, hanesan deskonfia malu, komete adulteiru, la-halo servisu uma laran, maun alin dun malu na'ok osan iha uma laran, fahe servisu ba malu maibé la-halo tuir, tan aman la fó osan ba oan eskola, tua lanu, problema ekonomia uma laran, la-ba partisipa iha lia mate, istori malu tanba selu oan nia eskola, no inan-aman baku oan fetu tanba rona katak, oan servisu bar ida iha Dili. Asaun violénsia maioria ho diskute malu uza lia fuan tolok, halo agresau fíziku ba malu. Husi insidente violénsia doméstika hirak ne'e kuaze vítima sira keixa hotu ba parte Polísia Nasionál Timor-Leste (PNTL) hodi kontinua prosesu investigasaun.

- **Inan Hakotu nia Bebé Vida ne'ebé Foin Moris**

Enkuantu iha Insidente 1 Inan hakotu nia bebé vida ne'ebé foin partu iha uma privadu ida hafoin soe bebé nia isin mate iha lixu fatin area Munisipiu Dili. seidauk hatene lolos motivu husi kazu ne'e no sei iha prosesu investigasaun Polisia Nasionál.

- **Insidente 4, Abuzu Violénsia, Asédiu Seksuál.**

Rezultadu monitorizasaun periodu ne'e hatudu katak, iha Munisipiu Dili Insidente tentativa violensia seksuál 1. insidente halo Abuzu seksuál iha 3 no agora prosesu ba tribunal. Insidente refere akontese iha Munisipiu Dili 1, Covalima 1 no Manufahi iha 2.

- **Insidente 6 Seluk Liga Violénsia Bazeia ba Jéneru (VBJ)**

Iha insidente 6 seluk ne'ebé kategoria violénsia Bazeia Jéneru (VBG), Insidente 4 akontese iha Munisipiu Baukau, Insidente ida akontese Munisipiu Dili, insidente ida seluk iha akontese iha Munisipiu Manufahi. Insidente mane klosan ida baku nia namorada, tanba namoradu fali ho mane seluk. Mane kazál ida halo ameasa ba fetu kazál ida no fetu klosan ida tanba foti nuu maran iha nia toos laran. Mane kazál ida seluk halo ameasa fíziku ba fetu kazál ida tan problema busa han manu, mane ida tenta atu tama ema nia uma no konsege uma nian fetu iha kuartu laran toman, hodi hakilar no la hatene nia objetivu atu tama kalan iha ema nia uma laran. Iha mane klosan ida abandona nia feen ho oan. Insidente hirak ne'e kuaze iha keixa hotu iha PNTL.





#### **INSIDENTE BA DISPUTA RAI, BALIZA TOOS NO UMA FATIN**

Periodu ne'e iha insidente 6 akontese tanba disputa rai, baliza toos no uma fatin, akontese iha munisipiu Covalima no Manufahi. Motivu identifika rai ba harii uma kbiit Laek iha Postu Tilomar, maibé parte seluk la fó rai ho razaun katak, rai eransa ho autoridade komunitária sei koko aproxima parte sira ne'ebé involve iha disputa ne'e hodi hetan rezolusaun no bele harii ba kbiit Laek sira, enkuantu disputa rai ba toos, no rai ba uma fatin akontese. Disputante sira iha relasaun hanesan familia no viziñu. Rezolusaun ba disputa rai presiza iha mekanizmu di'ak liu husi rezolusaun iha uma lisan ho kulturál, Mediasaun sai meus alternativu no kontinua keica iha PNTL hodi kontinua prosesu tuir lei ne'ebé iha.


#### **Insidente 6 Liga Krime Eleitoral Iha Eleisaun Prezidensial**

Hamosu insidente 6 iha Munisipiu Dili entre militante partidu politiku sira. Periodu ne'e mos nudar periodu tempu eleisaun Prezidensial ba segunda ronde, nune'e movimentu partidu politiku sira hala'o atividade kampaña eleitoral, militante no simpatizante entre Kandidatu sira sempre sadik no tuda malu. iha tempu eleisaun eleitores sira kontinua koko halo perturbasaun iha sentru votasaun no depois de eleisaun iha ema balun la simu rezultadu eleisaun hodi tenta hakarak estraga movimentu transporte públiku husi Rejiaun Leste, maibé la-konsege tanba hetan intervensaun husi parte seguransa, insidente hirak ne'e resulta ema kanek no estraga comunidade nia propriedade. Kazu hirak ne'e PNTL kontinua investiga no prosesu ba tuir lei ne'ebé iha.


## GRAFIKU KARATERÍSTIKA JERÁL INSIDENTE




### 5. FATIN AKONTESEMENTU INSIDENTE




### 6. SASÁN NE'EBÉ UZA IHA INSIDENTE




### 6. SASÁN NE'EBÉ UZA IHA INSIDENTE




### 7. EMA NE'EBÉ RESPONDE KA HAKALMA INSIDENTE



## 8. IMPAKTU HUSI INSIDENTE



## 9. FATÓR NE'EBE HAMOSU INSIDENTE



## ATIVIDADE PREVENSAN KONFLITU NO HARII DAME

### Sistema AtReS

Belun liu husi nia programa Atensaun no Responde Sedu (AtRes) hetan suporta finanseiru husi USAID Timor-Leste Atividade Advokasia ba Governasaun Di'ak hodi implementa atividade survei iha munisipiu Baukau ho foku ba "Mekanizmu Rezolusaun Disputa iha Nivel Komunitade iha Munisipiu Baukau", Survei ne'e halo iha postu tolu (Laga, Baukau no Vemasse) ho total respondente 191 (F 115 no M 76) respondente mai husi aldeia 12 ne'ebé selecta husi sistema Random. Survei ne'e hala'o ho durasaun loron lima ho enumeradór hamutuk na'in 5 (F 3 no M 2), Objetivu husi survei ne'e Atu fornese baze evidênsia ida ba apoia mediasaun komunitária kona-ba mekanizmu rezolusaun disputa iha nível komunitáriu iha munisípiu Baukau.



### Programa Ai ba Futuru

Fulan Abril – Maiu 2022, Belun Liuhosi program Ai ba Futuru ho parseria hamutuk GIZ, halo treinamentu kona-ba Analiza no aproximasaun ba konfliktu ba Lider komunitária sira iha suku 6 hanesan Suku Cairui Postu Laleia no Munisipiu Manatuto, Suku Uailaha Postu Venilale no Suku Sagadate Postu Laga Munisipiu Baukau, Suku Dilor Postu Lacluta Munisipiu Vikeke, no Suku Ililai Postu Lautem Munisipiu Lautem. Treinamentu ne'e partisipa husi Lider komunitária hamutuk 104, kompostu husi feto 38 no mane 66. Objetivu: 1) atu hasa'e lider komunitária koñesimentu kona- ba Analiza no aproximasaun ba konfliktu; 2) hasa'e comunidade sira nia partisipasaun iha analiza no aproximasaun ba konfliktu kona-ba rai no rekursu naturais; 3) atu hametin kooperasaun servisu ba prevensaun konfliktu kona-ba rai no rekursu naturais. Programa Ai ba Futuru hetan apoio finanseiru husi Uniaun Europeia no governu federal Alemaña liu husi ajénsia GIZ ho parseria hamutuk Ministériu Agrikultura no Peska.



## Community AWARENESS And Campaign

Formasaun 21 Abril-30 May 2022: organizasaun Belun fasilita treinamentu ba Joven, comunidade, autoridade lokál kona-ba Sensibilidade Jéneru, Transportasaun Konfliktu no Lideransa no Abilidade Komunikaun no representante grupu joven, comunidade no autoridade lokál sira hamutuk na'in 105 (Feto 47-defisiesia 1, mane 58-defisiesia 3, LGBTIQ 3) husi munisipiu Bobonaro (postu Balibo, Atabae no Cailaco), munisipiu Ermera (Railako, Atsabe) no atividade nee hetan suporta husi UNFPA no fundus husi European Commission (EC). **Objetivu formasaun:** hametin koñesimentu no hametin kapasidade comunidade feto mane no



joven sira ho kbiit ba responde no prevene konfliktu. Atividade nee komesa husi Abril-Agosto 2022. **Desimnazaun informasaun,** 29 Abril -30 Maiu 2022, Belun kontinua fahe informasaun ba Juventude, comunidade no Autoridade Lokál hamutuk ho parseiru xavi sira hanesan Seksaun Investigasaun Kriminál (SIK) husi VPU-PNTL, Knar no papél no mós Retifikasaun konvensaun International ba Labarik husi INDDICA, Polítika Nasional Juventude husi SEJD no LKVD husi SEII. Atividade nee partisipa husi representante suku husi munisipiu Bobonaro (Atabae no Cailaco), munisipiu Ermera (Railako no Atsabe) ho total partisipante 63 (Feto 19-defisiesia 1, mane 54-LGBTIQ 1, defisiesia 1). no atividade nee hetan suporta husi UNFPA no fundus husi EC. **Objetivu** mak hasa'e konsiénsia no koñesimentu benefisiariu ba abilidade prevene no responde violénsia bazeia ba jéneru no prevene violénsia hasoru feto no labarik.

## Peskiza Saneamentu Munisipiu Dili

Iha fulan 23 Maiu, treinamentu ba lora haat nian kona-ba peskiza sistema saneamentu. Belun hhametin parseria ho FHI360 ne'ebé hanesan Non-profit Human Development Organization based iha North Caroline U.S ba fulan 5 nian, atu halo peskiza ida hodi foti dadus kona-ba saneamentu iha Dili. Treinamentu via online ho zoom ne'ebé fasilita husi ekipa tékniku FHI360. objetivu husi peskiza ida ne'e maka atu dezeńu programa ida atu promove utilizaun no manutensaun sentina Fluxus ne'ebé liga ho sistema avaliasaun foun iha Dili, atu mós hamenus diária no moras sira seluk ne'ebé kauza husi saneamentu ne'ebé la hygeniku liu husi hapara fo'er ema nian ne'ebé kahur ka membru rai no bee iha rai laran. Iha Treinamentu ne'e kompostu husi enumerator na'in 10 (feto 6 mane 4) ho supervisor na'in rua, kkoordinadór na'in ida, ekipa management Belun na'in ida no konsultán ne'ebé kkontratu husi FHI360 na'in ida.

## Treinamentu ba Jovem sira kona-ba “Eleisaun Inkluzivu no Jovem Eleitór Foun sira

Belun liu husi nia pillar Dezenvolve Kapasidade Komunitade hetan apoiu finanseiru husi Governu Japaun liu-husi United Nation Development Program (UNDP) iha Timor Leste hodi

implementa atividade sensibilizasaun ba Joven feto-mane no ema ho defisiesia no mós ema inkluzivu kona-ba lala'ok eleisaun, regra eleisaun no oinsá prevene violénsia eleitorál e prevene



COVID-19 iha prosesu eleisaun no mós positivamente involvmentu polítika nain iha eleisaun. Atividade ne'e implementasaun iha munisipiu 9 (Baukau, Ermera, Covalima, Ainaro, Manufahi, Lautem, Vikeke, Bobonaro no Rejiaun Autonomia Especial Oecussi Ambeno). **Objetivu** treinamentu Atu hasa'e kapasidade no koñesimentu joven feto-mane no ema ho defisiesia sira hodi partisipa iha eleisaun no kontribui

ba estabilidade iha prosesu eleisaun. Atividade husi programa ne'e maka hanesan formasaun no desimnasaun kona-ba “**Eleisaun Inkluzivu ba Jovem Eleitór Foun sira**” atividade ne'e hala'o iha fulan Abril no Maiu 2022, implementa iha Munisipiu 6; Baukau, Ermera, Covalima, Ainaro, Manufahi no Lautem. Ba partisipantes hamutuk 173 (Feto 97, Mane 76) ne'ebé kompostu husi Estudante (Universidade no Sekundáriu), konsellu Juventude no representante Juventude Suku, Centru Juventude, RHTO no representante ONG Lokal iha Munisipiu. Realiza atividade refere, serbisu hamutuk ho Autoridade lokal, CNE, PNTL Konsellu Juventude, no representante Juventude iha kada Munisipiu.

## KONA-BA REVISTA NE'E

Desde Belun estabesimentu Sistema AtReS iha tinan 2008 to'o 2016, sistema ne'e konsege kobre Postu Administrativu 43 iha Munisipiu hotu, maibé ho limitasaun finanseiru ne'ebé organizasaun hasoru, iha 2017 sistema ne'e para provizoriu. Hahú reativa fali iha 2018 ho apoiu husi UN Women ho Programa Feto Pas no Seguransa ho area kobertura ba de'it iha Munisipiu Baukau, Covalima no RAEOA. Iha mediu 2019 (Maiu-Setembru) kobre tan ba Munisipiu Dili (iha Postu Administrativu 6) ho apoiu finanseiru husi DAP-DFAT. Iha tinan hanesan, ho apoiu Governu Alemaña, GIZ, sistema AtReS kontinua reativa fali iha Munisipiu 4, Dili, Baukau, Lautein no Vikeke (Postu Administrativu rua kada Munisipiu). Iha 2020 ho apoiu Sekretariadu g7+ reativa iha Munisipiu Likisá no ho apoiu UNDP nia Programa Sistema Justisa reativa tan iha Munisipiu Covalima. Iha Jullu 2020 tanba limitasaun orsamentu sistema ne'e paradu provizoriamente to'o Dezembru 2020 no iha tinan 2021 ho apoiu husi Rede Asia Pacific Partnership Atrocity Prevention (APPAP) no reativa fali iha tinan 2021 iha munisipiu 2 iha Munisipiu Dili (Postu Administrativu 2) no iha Munisipiu Likisá (Postu Administrativu 3). Hahu fulan Jullu 2021 Belun hetan tulun orsamentu ki'ik husi Unidade Apoiu Sosiedade Sivíl (agora temi” SASCAS) iha mahon Gabinete Primeiru Ministru ho orsamentu governu tinan fiskál kontinua apoiu Sistema AtReS hodi tau matan tan Munisipiu Baukau (Postu Administrativu 3), Dili (Dom Aleixo no Cristo Rei) no Covalima (Postu Administrativu 3) ate fulan dezembru 2021, Tuir mai Centru Nasional Chega! I.P (CNC) apoiu tan hodi kontinua alarga sistema AtReS ba

Munisipiu Ainaro (Postu Administrativu 3), Bobonaro (Postu Administrativu 3) no Manufahi (Postu Administrativu 3) ate fulan Dezembru 2021. ikus liu hetan tan apoiu husi Povu Amerikanu liu husi programa USAID/Timor-Leste NGO Advocacy for Good Governance Activity ne'ebé implementa husi Counterpart International kobre Munisipiu Dili no Baukau, iha tinan 2022.

Revista situasaun ne'e relata kona-ba asuntu xavi relasiona ho insidente violénsia no tendensia husi dadus monitorizasaun liuhusi Sistema Atensaun no Responde Sedu (AtReS) Timor-Leste durante Abril - Maiu 2022 iha Munisipiu, Baukau, Bobonaro, Covalima Dili no Manufahi.

#### Informasaun kle'an liu iha [www.atres.belun.tl](http://www.atres.belun.tl)

Atu hetan informasaun kléan liutan, favor kontaktu:

**Luis da Costa Ximenes**, Diretór Belun, [luis.belun@gmail.com](mailto:luis.belun@gmail.com)

**Romaldo Caetano**, Jestór Sistema AtReS: [romaldo.belun@gmail.com](mailto:romaldo.belun@gmail.com)

**Laurenco Adelaide**, Espesiálista ba Prevensaun Konfliktu, [lourenco.belun@gmail.com](mailto:lourenco.belun@gmail.com)